



Naaja Nathanielsen, Inatsisartuni ilaasortaq, Inuit Ataqatigiit
/ - Maani

§ 37 naapertorlugu apeqqummut nr. 2011-249-imut akissuteqaat

13. januar 2012
Sagsnr. 2011-059649
Dok. Nr. 802853

Asasara Naaja

Postboks 909
3900 Nuuk
Tlf. (+299) 34 50 00
Fax (+299) 34 54 10
E-mail: iaan@nanoq.gl
www.nanoq.gl

Akigititaasut ilusaat aamma Qorlortorsuarmi erngup nukinganik innaallagissiorfik pillugu isumaqatigiissitsiniarluni suliaq pillugu apeqquvitit ilassutaanut qujanaq. Akigititaasut ilusaat soqutigineqarnerat nuannaarutigaa.

Aallarniutigalugu erseqqissaatigissavara, Qorlortorsuaq pillugu isumaqatigiissitsiniarluni suliaq Narsami Qaqortumilu innaallagissamut akit qaffannerinut tunngaviusut arlallit ilagiinnarmassuk.

| | |
|---|------------------|
| Ungasianiit atuaasarnermik suliaq: | kWh-mut 0,44 kr. |
| Qorlortorsuaq pillugu suliaq: | kWh-mut 0,35 kr. |
| 2010-imi akigititaasunik naatsorsueqqinneq: | kWh-mut 0,39 kr. |

Apeqquinnut tunngavilersuutitut allapputit, akigititaasut ilusaat pillugit tunngaviusumik oqallinnissaq kissaatigigit. Narsami Qaqortumilu atuisut kisimik isumaqatigiissitsiniarluni suliamut aningaasartuutininik nammattussaannerat naapertuutinngitsutut isikkoqarmat isumaqataalluinnarpunga.

Oqaatigeqqillarali taamaattoqanngimmat. Atuisut akit annerpaaffissaat (1.1.2012-imi kWh-mut 3,33 koruunit) aqutigalugit illersugaapput, taannalu atuisut akiligassaasa qummut killissaraat.

Innaallagissamut imermullu akit, aalisakkerivinnut akillu annerpaaffissaannut atuutsinneqartut, immikkut ittumik appasitsinneqarnissaannut Namminersorlutik Oqartussat 2012-imi 66 mio. koruunit missaannik atuisussaapput. Tamatuma assersuutigalugu kingunerisaanik illoqarfinni marlunni taakkunani innaallagissamik tunisassiornermut atatillugu aningaasartuutaasussanut sanilliullugu Nuummi Sisimiunilu innuttaasut ukioq manna ataatsimut katillugu 49,8 mio. koruunit missaannik akiliinerusussaasut naatsorsuutigineqarpoq.

Qorlortorsuarmi isumaqatigiissitsiniarluni suliamut aningaasartuutit agguarneqarnerinut inatsisitigut naatsorsuuserinikkullu tunngaviusut pillugit arlalinnik apeqquqeqarputit, taakkulu matuma kinguliani ataasiakkaarlugit akissuteqarfigissavakka. Erseqqissaatigineqassaaq, apeqqu 4-mut akissut aggulunneqarmat.

1)

"Maleruagassat atuuttut malillugit sanaartortitsisup (Nukissiorfiit) aammalu entreprenøríp akornanni sanaartugaq saqitsaassutigineqalerpat aningaasartuuteqarfiulerpallu, tamanna Naalakkersuisut ilisimatitsinerat naapertorlugu illoqarfimmi nunaqarfimmiluunniit innaallagissamik, imermik kiammillu pilersorneqartunit matussuserneqartussaapput. *Innaallagissamut, imermut ataatsimoortumillu kiassarnermut immikkoortukkaanut aningaasartuutit naatsorsorneqartarnerini aningaasartuutit agguataarneqartarnissaannut periusissatut tunngavissanik aalajangersaasarneq pillugu Namminersornerullutik Oqartussat nalunaarutaat nr. 12, 10. august 2006-imeersoq* tamatumani najoqqutarineqartoq Naalakkersuisut innersuussutigivaat.

Taamatut paasinnineq paragrafimi sorlermi imaluunniit paragrafini sorlerni Naalakkersuisunit erseqqissumik tunngavissaqartinneqarpa?"

Akissut:

§ 4, imm. 1-imi allassimavoq, illoqarfinnut nunaqarfinnullu ataasiakkaanut agguaassinermit naatsorsuutit suliarineqartassasut. Narsaq Qaqortorlu innaallagissiorfimmit ataatsimit pilersorneqarmata, sumiiffiit taakku ataasiinnartut naatsorsuusiorneqassapput, tak. nalunaarummi § 4, imm. 2.

Agguaassinermit naatsorsuutini suut ilaatinneqassanersut § 7-imi allassimavoq:

"§ 7. Agguaassinermit naatsorsuutininut ilaapput pilersuiviit ataasiakkaat ingerlatsinermi sanaartormermit aningaasartuutaat imatut paasineqartussat:

1) Toqqaannartumik toqqaannartuunngitsumillu aningaasartuutit, taakkununga ilanngullugit sulisunut, naammassisaqarsinnaassutsikkut aningaasartuutininut, isumakkeerisarnernut, nioqqutissanik atuinermut, ernianut il.il. aningaasartuutit.

2) Pilersuiviup nammineerluni akilersuutigisartagai."

Isumaqatigiissitsiniarluni suliaq Qorlortorsuarmi erngup nukinganik innaallagissiorfiup sananeqarnerani suliassamut isumaqatigiissummut tunngasuvoq. Tassalu tassani aningaasartuutit sumiiffinnut marlunnut; Narsamut Qaqortumullu, erngup nukinganik innaallagissiorfimmit pilersorneqartunut taakkununga toqqaannartumik attuumassuteqartut pineqartut.

Suliamut aningaasartuutit, 2012-imi akigititaasunut sunniuteqartussat teknikkikkut siunnersortininut, eqqartuussissuserisunut aamma isumaqatigiissitsiniarnermit eqqartuussivimmut aningaasartuutaasimapput. Suliamut aningaasartuutit taakku *ingerlatsinermit aningaasartuutit* akilerneqarsimapput, tassalu ukiuni ataasiakkaani naatsorsuutininut aammalu uuttuummut ataatsimut aningaasartuutininut sunniuteqartut.

2)

"Nalunaarummi § 7-mi "sanaartormermit aningaasartuutit" pineqartut Naalakkersuisut paasinninnerat naapertorlugu aamma tassaasinnaappat sanaartortitsisup inatsisilerinikkut/aningaasatigut saqitsaassuteqarnermi aningaasartuuteqarfigisai - saqitsaassutaasoq naak suli naammassineqanngikkaluartoq? Imaluunniit imaannerpa sanaartortitsinermit aningaasartuutaasimasut naatsorsorneqartarlutik sanaartormermit aningaasartuutaasimasut suliaq naammassivinneqarnerani tamakkivillugit aatsaat takussutissiorneqarsinnaaleraangata?"

Akissut:

§ 7-imi aalajangersarneqarpoq, sumiiffinnut ataasiakkaanut agguaassinermut naatsorsuutit, aalajangersakkami nr. 1-imi aamma 2-mi erseqqissarneqartut ingerlatsinermut sanaartornermullu aningaasartuutit imaqqassasut.

Sanaartornermut akiusoq tamarmiusoq qaqugukkut naatsorsorneqassanersoq, imaluunniit aningaasartuutit suut sanaartukkani pigisanut ilanngunneqarsinnaanersut aalajangersakkami isummerfigineqanngilaq. Kiisalu qaqugukkut ingerlatsinermut imaluunniit sanaartornermut aningaasartuutit isigineqassanersut aalajangersakkami aalajangersarneqanngilaq. Taamaattumik aalajangersakkamut naatsorsuuserinermi tunngavissat nalinginnaasut il.il. tapertarineqartariaqarput.

Sanaartukkap nalinganik aammalu aningaasartuutit suut tassunga tapertaliunneqarsinnaanerit aalajangersaanermi, naatsorsuutit pigisap nalivianut naleqquttuunissaat aallaavigineqartussaavoq.

Isumaqatigiissitsiniarluni suliamik aalajangiinermi Nukissiorfiit taarsiisussanngortinneqassappata, tamatumunnga atatillugu taarsiissutissat – Nukissiorfiit taakkulu kukkunerisuiuisua isumaqatigiinnerat malillugu – sanaartukkap nalinganut ilanngunneqartarnissaat anguniarneqassaaq. Tamanna aningaasartuutit atuutsinneqalerneranik taaneqartarpoq, tassalu aalajangersimanerusumik aningaasartuutit sanaartornermut aningaasartuutit, sanaartukkap atasinnaassusiatut naatsorsuutigineqartumut nalikilliliiffigineqartutik suliarineqassapput.

Tamatumunnga atatillugu Nukissiorfiit isumaqatigiissitsiniarluni suliap ingerlanneqarneranut aningaasartuutit akiligassat atuutsinneqalernissaat anguniassavaa. Kisiannili tamanna taamaallaat suliamut aningaasartuutit ilaannut, aammalu suliap ingerlanerani piffissamit aalajangersimasumit atuutsinneqalersinnaanissaa ilimagineqarpoq.

3)

"Nalunaarummi § 12 ima oqaasertarpoq: "Aningaasaliinermut akiliutit agguaassinermut naatsorsuutit ilanngullugit naatsorsorneqartassanngillat. Akiliutit naatsorsuutit ilanngunneqarsinnaassapput Inuussutissarsiornermut Pisortaqarfik taamaasiornissamut akuersissuteqassappat. Taamaattoqassappat immikkoortukkaanut aningaasartuutit 5 %-a angullugu akiliutissaq naatsorsorneqarsinnaassaaq, tassungalu ilanngunneqartassalluni".

Nalunaarut naapertorlugu Qorlortorsuarmi erngup nukinganik innaallagissiorfiliaq tassaava "aningaasaliinermut akiliutit" (investering) imaluunniit (§ 7 malillugu) "sanaartugaq"? (anlæg). Oqaraanni erngup nukinganik innaallagissiorfik tassaasoq "aningaasaliinermut akiliutit", taava Narsami Qaqortumilu atuisut procentinik qassinik akiliisassasut isumaqatigiissutaasimava?"

Akissut:

Qorlortorsuarmi erngup nukinganik innaallagissiorfik sanaartornermut aningaasaliiffiuvoq, tassalu innaallagissiorfimmu atatillugu nalikilliliinermi uuttuummut ataasimut aningaasartuutit ilaasussaalluni. Tamatuma saniatigut Nukissiorfiit ernianut ilanngaaseriikkanut nammagassaat, nalunaarummi § 10-imi aalajangersarneqartut ilaasussaapput.

Nukissiorfiit tunngaviusumik aningaasaliissutinik uuttuummut ataatsimut aningaasartuutitut ilanngussisinnaangitsut, § 12-imi aalajangersarneqarpoq. Taamaattorli Nukissiorfiit Ineqarnermut, Attaveqarnermut Angallannernullu Naalackersuisoqarfimmit siumoortumik akuerineqareernermigut aningaasaliissutinut illuartinneqarsinnaasumik, sumiiffimmi uuttuummut ataatsimut aningaasartuutit 5%-at angullugu aningaasaliissutinut akiliutinik ilassusiisnaapput.

Tassalu § 12 naapertorlugu aningaasaliissutinut akiliutissat aningaasanik, soorlu erngup nukinganik innaallagissiorfimmi sananermut atorneqarsinnaasunik sipaagaqarnissamut atorneqarsinnaapput.

Qorlortorsuarmi erngup nukinganik innaallagissiorfimmi nalunaarummi § 12 naapertorlugu aningaasaliissutinut illuartsisoqarsimanngilaq.

4.1.)

"Naalackersuisut akissuteqaamminni allapput; Nukissiorfik saqitsaanermi ajorsartitaassagaluarpat akiligassanngorsinnaasut Narsami Qaqortumilu atuisunit akilerneqartariaqassasut aammalu periuseq tamanna sulianut siusinnerusukkut tassunga assingusunut assingulluinnartuusoq. Taamaammat aperissaanga:

Nalunaarut pineqartoq atortuulersinneqareernerata kingorna suliat assingusinnaasut qassiuppat?"

Akissut:

Nukissiorfinniit ilisimatitsissutigineqarpoq, Ilulissani imiliorfik pillugu isumaqatigiissitsiniarluni suliamik ingerlaloortumik allamik aamma peqartoq. Suliaq taanna 2004-mi aallartippoq, tassalu assigiimmik akeqartitsiunnaarnerup aallartinnissaa sioqqullugu pisuulluni. Suliap 2012-imi qaammatit siullit pingasut ingerlanerini naammassinissaa naatsorsuutigineqarpoq.

4.2)

"Suliani taamaattuni aningaasat qanoq amerlassuseqarsimappat aammalu sumiiffikkaartuni akigitinneqartunut qanoq tamakku sunniuteqarsimappat?"

Akissut:

Ilulissani imiliorfik pillugu isumaqatigiissitsiniarluni suliamut aningaasartuutit ingerlaavartumik Ilulissani ingerlatsinermut naatsorsuusiorneqartarput. Suliap inernissaa apeqqutaatinnagu aningaasaqarnikkut sunniutaasinnaasut, plus/minus 2,5 mio. koruuniunissaat naatsorsuutigineqarpoq. Ukiumoortumik akigititaasut sunniutissaanik naatsorsuusiortoqarsimanngilaq.

4.3)

"Nukissiorfiit saqitsaassuteqarnermi ajorsartitaassagaluarpat aningaasat qassit tassanga aningaasartuutigineqaratarsinnaassappat, Narsami Qaqortumilu atuisunit akilerneqartariaqartussat?"

Akissut:

Energikonsortiet I/S-ip aallaqqaammut piumasaqaatigisai 235 mio. koruuniupput, taakkunungalu erniat allaffissornermullu aningaasartuutit ilanngunneqassapput.

Isumaqatigiissitsiniartarnermut eqqartuussiviup Energikonsortiet suliami tamakkiisumik tapersissappagu, tamanna inernerisassani eqqarsaatigineqarsinnaasuni ajornerpaasussaavoq. Kisiannili tamatumunnga ilassutigalugu oqaatigineqassaaq, piumasaqaat tamanna Nukissiorfinnit aamma Namminersorlutik Oqartussanit isumaqataaffigineqanngimmat, tamaattumillu suliaq aaqqiagiinngissutaasoq isumaqatigiissitsiniartarnermut eqqartuussivimmit suliarineqarpoq.

Suliari taanna ingerlaloortuummat, pissusiviusut eqqarsaatigalugit suliap inernerisinnaasaani suna ajornerpaassanersoq annertunerusumik oqaaseqarfigisinnaanngilara.

5.)

”Naalackersuisut akissuteqaamminni allapput; Qorlortorsuarmi nukissiorfionermut atatillugu aningaasartuutit qanoq agguarneqarnissaannut tunngavissat allanngortinneqassagaluarpata tamanna isornartoqartinneqassasoq, allanngineq siusinnerusukkut sulianut tassunga assingusunut naapertuukkunnaassamat. Nukissiorfiup aalajangiineratigut sanaartukkat nutaat naammassineqarnerini inatsisilerinikkut saqitsaassutaalersut atuisunit akiligasanngortinneqartalissappata, taamaammat paaserusuppara tamanna ”tunngavissat” aalajangiusimaneqarusunnerannik imaluunniit maleruagassat erseqqissuutittariaqarnerannik tunngaveqarnerosoq? Matumani Nukissiorfiit sanaartortitsisutut akisussaaffimmik sumiginnaaratarsimasinnaanera eqqarsaatigaara. Naalackersuisummi akissuteqaamminni nassuerutigivaat inatsisilerinikkut saqitsaassutaasoq Narsami Qaqortumilu atuisunut tutsinniarneqarsinnaanngitsaq. ”Tunngavissat” maleruagassat erseqqissuusariaqarnerannut sanilliullugit pingaartinneqarnerussappata, maleruagassanik saneqqutaarinninngikkaluarluni siusinnerusukkut qanoq iliortarsimanerit aamma qimanneqaannarsinnaannginnamik?”

Akissut:

Apeqqutinni sammiviit marluupput. Maannakkut akigititaasut ilusiligaanera, Assigiimmik Akeqarunnaartitsineq 2004 – 2005-imi aalajangiiffigineqarpoq, aammalu najoqqutarisat assigiinngitsut arlallit atorlugit aalajangiiffigineqarluni. Assigiimmik akeqarunnaartitsinermit najoqqutarineqartoq tassaavoq ”Innaallagissamik, imermik kiassarnermillu assigiimmik akeqartitsineq allanngortinniarlugu ikaarsaarnissamat nalimmassaanissamullu aaqqiussuussinissamik Naalackersuisut siunnersuutaat”.

Inatsisit najoqqutarineqartut tassaapput:

- 2012-imit aningaasanut inatsit – kontomut pingaarnermut 73.94.02 Nukissiorfiit (Ingerlatsinermit aningaasaliissutit) oqaasertaliussat
- Innaallagissamat, imermut ataatsimoortumillu kiassarnermut immikkoortukkaanut aningaasartuutit naatsorsorneqartarnerini aningaasartuutit agguataarneqartarnissaannut periusissatut tunngavissanik aalajangersaasarneq pillugu Namminersornerullutik Oqartussat nalunaarutaat nr. 12, 10. august 2006-imeersoq.

- Kiisalu aningaasartuutiviusut tunngavigalugit akigititaasut, kiisalu akit annerpaaffissaat minnerpaaffissaallu, allaffissornikkut Nukissiorfiit tunisinermut pilersuinerullu piumasaqaataannut ilanngussaq 1-imi atuutsinneqalersut.

Isumaqatigiissitsiniarmermi suliani aalajangersakkamik aalajangersimasumik, sulianut aningaasartuutit taarsiissutillu qanoq isumagineqarnissaannut maleruagassiuiffiusumik soqanngilaq. Taamaattumik aningaasartuutit agguaanermut naatsorsuutini qanoq iliorluni inissinneqassanersut pillugu Nukissiorfiit – maleruagassat atuuttut naapertorlugit – aalajangersimasumik naliliiniartillugit nassuiaatissamik nassaarniartoqartariaqarpoq. Aammattaaq apeqqut 1-imut akissutigat takuuk.

Nassuiaassutissamat aalajangersimasumut aaqqiissutaasinnaasumi soorunami, illoqarfinni nunaqarfinnilu ataasiakkaani akiusut, pilersuinermi aningaasartuutaasut naleqqunnissaannut assigiimmik akeqarunnaartitsinermi tunngaviusoq pingaarneq aallaavigineqassaaq. Siusinnerusukkut sulianut assingusunut tunngatillugu naatsorsuutini agguaaffiusuni allaffissornermi suleriaasiusut aamma tamatuminna naliliinermit ilaatinneqassapput.

Taamaattumik suliami aningaasartuutit najukkami agguaanissamat allaanerusumik agguarneqarnissaat maannakkut maleruagassaasunut naleqquttussaangilaq.

Apeqqutivit sammiviata aappaa naatsorsuuserinermit teknikkimut tunnganeruvoq.

Qorlortorsuaq pillugu isumaqatigiissitsiniarluni suliaq 2009-mi aallartippoq, aammalu 2010-miit suliamut aningaasartuutit 2012-imut akigititaasunut sunniuteqartuupput. Nukissiorfiit 2012-imut akigititaanni ukiumut naatsorsuutit ataasiakkaanullu aningaasartuutit piviusunngortinneqartut nutaanerpaat, tassalu 2010-meersut tunngavigineqarnerat tamatumunnga pissutaavoq.

Taamaattumik aamma allannguinerup kingunerisaanik Nukissiorfiit 2010-mi aningaasartuutinik agguaanerisa akiliinerisalu ilusiat allanngortinneqartariaqartussaavoq, taamaattumillu naatsorsuisarneq atuuttoq saneqqunneqartussaassalluni. Aammattaaq tamatuma kingunerisaanik naatsorsuisarnermi tunngaviusut atuuttut allanngortinneqartussaassapput.

Allannguutit matuma siuliani taagorneqartut Nukissiorfiit avataaniit kukkunerisuisuisa uparuarsimassagaluarat ilimagineqarluarsinnaavoq.

Neriuppunga akissutikka naammagisimassagitit.

Inussiarnersumik inuulluaqqusillunga

Jens B. Frederiksen